



**REPUBLIKA E SHQIPËRISË**  
**AGJENCIA E SIGURIMIT TË CILËSISË NË ARSIMIN E LARTË**  
**BORDI I AKREDITIMIT**

**VENDIM**

**Nr. 46, datë 19.11.2021**

**PËR**  
**AKREDITIMIN E PARË TË PROGRAMIT TË STUDIMIT TË CIKLIT TË PARË**  
**BACHELOR NË “KONTABILITET”, TË UNIVERSITETIT “ISMAIL QEMALI”,**  
**VLORË**

Bordi i Akreditimit, bazuar në Ligjin Nr. 80 datë 17.09.2015 “Për arsimin e lartë dhe kërkimin shkencor në institucionet e arsimit të lartë në Republikën e Shqipërisë”, Ligji Nr. 8480, datë 27.5.1999 “Për funksionimin e Organeve Kolegjiale të Administratës Shtetërore dhe Enteve Publike”, Ligjin Nr. 44/2015, datë 30.04.2015, “Kodi i procedurave administrative të Republikës së Shqipërisë”, Vendimin e Këshillit të Ministrave Nr. 109, datë 15.02.2017 “Për organizimin dhe funksionimin e Agjencisë së Sigurimit të Cilësisë në Arsimin e Lartë e të Bordit të Akreditimit dhe për përcaktimin e tarifave për proceset e sigurimit të cilësisë në arsimin e lartë”, i ndryshuar, Vendimin e Këshillit të Ministrave nr. 531, datë 11.9.2018, “Për miratimin e Kodit të Cilësisë së Arsimit të Lartë”, Vendimin e Bordit të Akreditimit, Nr. 1, datë 07.04.2017, “Për mbylljen e procedurave të mbartura për shkak të riorganizimit të Institucioneve të Sigurimit të Cilësisë në Arsimin e Lartë”, Vendimin e Bordit të Akreditimit, Nr. 2, datë 07.04.2017, “Për përcaktimin e kohëzgjatjes dhe afateve të vlefshmërisë së akreditimit në kuadër të vendimmarrjes për akreditimin e Institucioneve të Arsimit të Lartë dhe Programeve të Studimit” dhe Vendimin e Bordit të Akreditimit, Nr. Ekstra 1, datë 02.02.2018 “Për miratimin e Rregullores së Bordit të Akreditimit”, në mbledhjen e tij të datës 19.11.2021, në kuadër të vendimmarrjes për akreditimin e parë të programit të studimit të ciklit të parë, Bachelor në **“Kontabilitet”**, me të dhënat si më poshtë:

- a) Emërtimi i programit: Bachelor në **“Kontabilitet”**
  - b) Cikli i studimit: Cikli i parë
  - c) Akti zyrtar i hapjes/licensimit: Urdhër i Ministrit të Arsimit dhe Shkencës Nr. 270, datë 10.06.2011
  - d) Institucioni që e ofron: Universiteti “Ismail Qemali”, Vlorë
  - e) Njësia bazë përgjegjëse: Departamenti i Financës dhe Kontabilitetit
  - f) Kohëzgjatja (Vite/semestra): 3 vite / 6 semestra
  - g) Kredite (ECTS): 180 kredite
  - h) Forma e studimit: Me kohë të plotë
  - i) Statusi i diplomës: ofrohet vetëm nga Universiteti “Ismail Qemali”, Vlorë
  - j) Niveli i diplomës në kuadrin e Kornizës Shqiptare të Kualifikimeve: Niveli 6
- pas **mori në shqyrtim:**

- a. Dokumentacionin e Vetëvlerësimit, përfshirë të dhënat e programit të studimit;
- b. Raportin e Vetëvlerësimit dhe dokumentacionin mbështetës;
- c. Dokumentacionin e Vlerësimit të Jashtëm, përfshirë Raportin e Vlerësimit të Jashtëm, dhe dokumentacionin shtesë;
- d. Raportimin e Ekspertëve të Vlerësimit në mbledhjen e Bordit;
- e. Vlerësimin e cilësisë në përmbajtje, të kryer nga ekspertët e jashtëm në përbërje të Grupit të Vlerësimit të Jashtëm;
- f. Procedurën e vlerësimit të ndjekur dhe monitoruar nga ASCAL;
- g. Komunikimin e vërejtjet e institucionit në kuadër të këtij procesi;

**konstaton se:**

- a. Procedura dhe procesi i vlerësimit janë kryer në përputhje me parashikimet ligjore dhe nënligjore dhe afatet e përcaktuara në këto akte;
- b. Vlerësimi në përmbajtje është i mbështetur në Dokumentacionin e Vetëvlerësimit, Vlerësimit të Jashtëm dhe gjetjet e verifikimet gjatë vizitës në institucion;
- c. Raporti është hartuar në përputhje me kërkesat dhe i mbështetur me fakte, të dhëna e dokumentacion plotësues;
- d. Rezultatet e vlerësimit janë nxjerrë në përputhje me gjetjet, pikat e forta e afirmimet dhe pikat e dobëta, të identifikuar e verifikuar përmes dokumentacionit dhe vizitës në institucion;
- e. Rezultati i vlerësimit në lidhje me shkallën e plotësimin të “*Standardeve për sigurimin e cilësisë për programet e studimit të ciklit të parë “Bachelor”*” dhe cilësinë e ofertës akademike të programit të studimit është “**i përmbush pjesërisht standardet**”, me mangësitë si më poshtë:
  - 1. Mungesa në kurrikulën e programit të studimit e praktikës profesionale.
  - 2. Mungesa e diversifikimit të mekanizmave për sigurimin e brendshëm të cilësisë, sikurse parashikohet në Statutin e institucionit.
  - 3. Mungesa e një studimi të mirëfilltë të tregut të punës, lokal dhe rajonal ku të përcaktohen nevojat specifike për specialistë të fushës së kontabilitetit.
  - 4. Ndarja jo e qartë e detyrave dhe përgjegjësiive mes strukturave/njësive të krijuara rishtazi në institucion dhe raportim jo fort i formalizuar dhe harmonizuar mes këtyre strukturave/ njësive.
  - 5. Mungesa e analizave financiare për këtë program studimi dhe mospërcaktimi i qartë i kostos për student.

*Mbështetur mbi rezultatet dhe arsyetimin e mësipërm, Bordi i Akreditimit,*

**VENDOSI:**

- 1. Vlerësimin përfundimtar **POZITIV** për programin e studimit **Bachelor** në “**Kontabilitet**”, të **Universitetit “Ismail Qemali”, Vlorë**, me rekomandimet sipas shtojcës së këtij vendimi.
- 2. **Akreditimin** e programit të studimit me kohëzgjatjen prej **3 (tre)** vite.

INDRIT HOXHA

*Indrit Hoxha*

Anëtar

**Shënim:** Znj. Lea Ypi nuk mori pjesë në këtë mbledhje.



## Shtojca

Rekomandimet në zbatim të vendimit të Bordit të Akreditimit Nr. 46, datë 19.11.2021, “Për akreditimin e parë të programit të studimit **Bachelor në “Kontabilitet”**”, të Universitetit “Ismail Qemali”, Vlorë, janë si vijon:

1. Institucioni, të përfshijë në kurrikulën e programit të studimit, praktikën profesionale.
2. Institucioni, të përdorë metoda të drejtpërdrejta dhe të tërthorta për vlerësimin e herëpashershëm të cilësisë së programit të studimit, realizimin e mbarëvajtjen e tij, siç janë intervistat apo sondazhet me studentët; vëzhgimet në auditor nga kolegë apo të ftuar të tjerë; ftesa nga akademikë të njohur jashtë institucionit për të vlerësuar cilësinë e programit të studimit etj.
3. Institucioni, të kryejë një studim të mirëfilltë të tregut të punës ku të identifikojë nevojat e tregut të punës për studentët që diplomohen në këtë program studimi si dhe kërkesat për këtë program studimi në nivel rajonal, në përgjigje të ndryshimeve demografike dhe uljes së numrit të studentëve në vitet e fundit.
4. Institucioni, të marrë masa që, strukturat e reja si Drejtoria e Edukimit, Njësia e Sigurimit të Brendshëm të Cilësisë, të përforcohen dhe mbështeten edhe më shumë me burime për të kryer të gjitha funksionet e nevojshme në shërbim të studentëve dhe përmirësimit të cilësisë së mësimdhënies, dhe cilësinë e kurrikulës dhe syllabuseve të këtij programi studimi.
5. Institucioni, të kryejë analiza financiare më të plota për këtë program studimi, ku të evidentohet qartë kostoja mesatare për student.
6. Institucioni, të unifikojë formatet e syllabuseve të këtij programi studimit dhe të përditësojë ato me vitin e botimit të literaturës së detyrueshme dhe ndihmëse, duke u fokusuar jo vetëm tek tekstet mësimore, por duke përfshirë edhe artikuj shkencorë të botuar në revistat më të mira botërore në këtë fushë.
7. Institucioni, të hartojë plane të detajuara për trajnimin e vazhdueshëm të stafit akademik në mësimdhënie dhe ti mbështesë ata në kryerjen e studimeve shkencore cilësore në fushën e tyre.
8. Institucioni, të shohë mundësinë e përfshirjes në kurrikulën e këtij programi studimi, lëndën “Auditim”, për të bërë të mundur plotësimin e spektrit të objektivave të vendosura në programin e studimit.
9. Institucioni, të shohë mundësinë e ofrimit si një program i përbashkët Bachelor në Finance-Kontabilitet me mundësi specializimi në dy profile në vitin e tretë të studimeve, në linjë me praktikën më të mira ndërkombëtare të këtyre programeve të studimit, kjo edhe për faktin e uljes së numrit të studentëve në këtë program studimi.

Në përmbushje të rekomandimeve të mësipërme, **Universiteti “Ismail Qemali”, Vlorë**, duhet të hartojë një Plan Veprimi konkret dhe ta dorëzojë atë brenda 6 (gjashtë) muajve pranë Agjencisë së Sigurimit të Cilësisë në Arsimin e Lartë.

Ngarkohet ASCAL për ndjekjen e përmbushjes së këtyre rekomandimeve dhe raportimin në BA brenda afatit të përcaktuar në Planin e Veprimit.

